



Grad Crikvenica



10.1. – 18.2. 2026.



# ŠENTENCA 2026.

# ŠENTENCA 2026.



## SUDAC

Dobri moji vredni ljudi,  
smo l' bedasti ili ljudi?  
Ča je bilo prošlo leto,  
reć ću van evde šćeto.  
Niš nan ne re ko po loju,  
dobro da smo još na broju.  
Ča se stvaru na ven svitu,  
va velen smo, debelen glibu.  
Tečeš, delaš, muku mučiš,  
za tu plaću niš ne kupiš.  
Stalno smo va ten strahu,  
će l' nan kračun stavit na banku.  
Takujin nan ni ne rabi,  
propuh va njen na se bandi.  
Otpuše ti ono soldi,  
od muki dobiješ i morojdi.  
Napinješ početak s onin krajen,  
niš ti love ne potraje.  
Cjene šle su se do neba,  
bedasti smo, tako nan treba.  
Oni gore filozofi  
kupuju ćorki i topi.  
Delaju za svoj tron,  
kupit će još ki rafale avion.  
Kroje nan va Briselu gaće,  
dug još imamo od onoga čaće.  
Va saboru iste face,  
praznu slamu stalno mlate.  
Uvik neki drugi je kriv,  
lopina dobro da bi se sakril.  
Ustoličen je ovaj evde,  
krivnje naše da pobere.  
Glas naroda će se čut,  
kad se osudi poč će na stup.  
Ime smo mu dali ovo,  
nek parti pa ćemo nanovo.  
Pjesnička je evde sloboda,  
žensko ime, a muškoga je roda.

## TUŽIIOC

Ča je zeto, a ča dato,  
reć ću van, i to je tako.  
Baš su neki pravi škrci,  
stisnu rit da ne biže prci.  
Čekalo se j' celo leto,  
ma je maškarami njihovo zeto.  
Napravili su barufu celu,  
maškarami sramotu velu.  
Meriko se j' rano krstil,  
brzo na stupu završil.  
Čudili se stari meštri,  
od srama zaprli poneštri.  
Va današnjnen maškaranon dobu  
ko na place da j' za kupit robu.  
Pogađa se ni mimo ni vrit,  
ko da maškare moreš kupit.  
Ne znaju oni ča su tanci,  
kamoli maškarane stare užanci.  
Ki evde vuče konci,  
ni baš od vele forci.  
Tanci su pali na kolena,  
va pitanju je neka žena.  
Volju ona svoju vodi,  
maškare va pitanje dovodi.  
Imet tanci ili ne,  
pitanje je sad.  
Zmenit će se totu neš morat.  
Prošli su oni lipi dani,  
va Inter jedva su ljudi stali.  
Čekalo se j' va redu za tanac,  
samo da se stira ki pijanac.  
Nikad više ono doba,  
se je sada pokvarena roba.

## MERIKO

Evde smo va velen čudu,  
kad nan rabe na su muku.  
Va gradu su šilice jake,  
tuliko da samo znate.  
Delo delan, baš mi se neće,  
ključ da zgubin kamo li sriće.  
Porubit kad odeš gaće,  
zmolit moraš tri, četire očenaše.  
Noson takneš ona vrata,  
zaključano ko za vrime rata.  
Na papiru vrime piše,  
za razumet trebaš školi više.  
Niš za maškare ne moreš skrojiti,  
kamoli jedan veštid zašit.  
Na vratesh jedne slova pišu,  
ne delan stalno, vrag zel i prišu.  
Ni na drugeh ni sriće,  
i totu imaju pokriće.  
Eno dole jednoj piše,  
drugi dan više sriće.  
Delan od sedan do tri,  
sredun ne delan, aš mi se spi.  
I evde je ona zadnja,  
s nikin se ona ne kara.  
Zarada njoj ni baš manja.  
Piše lipo čрно na belo,  
priden i projden kad mi se htelo.  
Pomoli se da ti ča ne pukne,  
najbolje da su svitice ti šupe.



## BRANIOČ

Grad je dobil novu vlast.  
Če l' nan ona vadit mast,  
dal va njoj je vela strast.  
Zasela j' va fotelju vruću,  
strah i trepet za gradsku kuću.  
Šakun po stolu j' opalila,  
nekomu računi zamrsila.  
Prva na vlasti da je dama,  
izobilja gradu neće bit kraja.  
Digla je se na nogi,  
ča je bilo, evo van rogi.  
Rastirala je si zli duhi,  
pobegle su i one muhi.  
Dala se j' ona va delo,  
nekomu se ni baš htelo.  
Prosela je se kroz sito,  
neće lenčini, a ni mito.  
Si su vukli na svoj kraj,  
samo lov u daj, pa daj.  
Dobili su neki packu,  
da su loši za vlast gracku.  
Slabo delaju, niš se ne more,  
dobili su vele pokore.  
Stala je sakomu na rep,  
mislili su lahko će pobeć.  
Malo morgen!  
Čestitku dobili smo lipu,  
komunalije šle su gore tri put.  
To van je za pokoru,  
pa živite evde na moru.

## SUDAC

Most je gore pukal,  
ki je totu soldi zvukal?  
Vrime mu je već pasalo,  
železo svoje vrime dalo.  
Obećali su još i lane,  
bit će to da ti pamet stane.  
Zamaskirali su onu školju,  
sad ti auti poskakuju.  
Kolona se vela stvara,  
radi nečijega nemara.  
Kad poskočiš gore-dole,  
do Italije vidiš more.  
Va želucu koma stanje,  
potira te na velo sranje.  
Kad zapuše ona bura i  
zafiče sinfonija zi G dura.  
Kolona se vela vuče,  
panduri va zasede čuče.  
Napišu ti valje kaznu,  
aš vučeš se brzinu slabun.  
Zi žepa ti lovu maznu,  
kad podmišiš, brišu kaznu.  
Čekat ćemo još ko leto,  
kad navršiš pedeseto.  
Generalku će delat onda  
kad ga ne bude više morda.

## TUŽIOČ

Va nen parku eno gore,  
hotel stoji ki gljeda na more.  
S njega vidiš ča i nećeš,  
najviše va vrićah ono smeće.  
Kupe tobože ono lišće,  
va vriće ga neki natišće.  
Lipi, krasni oj, turizme,  
kada ono gosti vide.  
Stoji tamo i ki tjedan,  
ni ki prit po njega vredan.  
Gosti oče svoje okreću,  
akciju svoju morda pokreću.  
Murvice su konkurenti,  
si to videl, ješenti.  
Umjetnost va ten vide,  
niki po to neće da pride.  
Zoki krade bogu dane,  
ljut je na se kad i zora svane.  
Vrime da projde jedva čeka,  
kad odmori treba mu postelja.  
Zapali španjulet jedan il dva,  
piva mu j' mrzla dobro došla.  
Lahko za to malo lišća,  
biži Zoki od dela ča!

## MERIKO

Crikvenice lipi grade,  
na Petaku toranj grade.  
Lipa ti je to užanca,  
građevinska za dva janjca.  
Usta su njin jako masna,  
kožica je jako slasna.  
Pucketala j' pod zubami,  
tako ti se fuš izgradi.  
Magičari to su stari,  
lažni papiri kad su pravi.  
Kuvertica kad zašuška,  
zakonu je vela čuška.  
Dobra j' svota totu bila,  
zalela se j' s buteljnu vina.  
Na šampanj je prešla ekipa cela,  
bome je jaška bila vela.  
Vidikovac navrh tornja,  
kamo većeg gradu konfora.  
Hodit će totu gradska svita,  
nas se totu niš me pita.  
Gledat će se plavo more  
i bančevat se do zore.  
Niš ni više se za pravo,  
glavno da se j' mito dalo.


## BRANIOČ

Ki je zmislil onu gajbu,  
dat mu treba zlatnu kolajnu.  
Na Turesu pravi cirkus,  
prasci nose kuga virus.  
Va saboru se to prate,  
prasci kako tamo mlate.  
Više blaga nego gosti,  
ča delaju leni lovci.  
Šeću se i po plaže,  
papkami kupače gaze.  
Ni nan dosti sega sranja,  
raskopana još imanja.  
Po gradu nan kropi blago,  
vrti i parki – se j' raskopano.  
Kultivator ko da prođe,  
beštija ti se poglođe.  
Došli prasci na pojilo,  
mački kade se j' hranilo.  
Došal prasac jednoj za stol,  
napravil joj je karambol.  
Ona i muž se natežu,  
zamahnula i razbila mu protežu.  
Stavil jadnan zubi na klin,  
prasac pobegal, ča će šnjin.  
Fasovala je kašnje ta žena,  
nosi očali škuri fanj vrimenta.

## SUDAC

Usred grada strah te svlada,  
šundra te mlada dama.  
Ni hodit ne moreš više,  
črno ti se morda piše.  
Kakovo j' ovo doba,  
vozi auto ko da j' proba.  
Zamantala j' dva, tri puti,  
ljudi bižali sa seh ruti.  
Va matičen je dama bila,  
popila se j' morda piva.  
Zvukla je jedva glavu živu,  
kakova j' tek na Martinju.  
Stavila je nekoga na muki,  
prsteni stavila na ruki.  
Počastit je ona htela,  
auton va izlog se zaletela.  
Hodila je po nu picu,  
drive in vrata, mislela, se miču.  
Čoviku slomila ruki,  
bez masti ostali su mu kuki.  
Zamantala ga j' na ni šank,  
po danu videl je črni mrak.  
Ni za sakog volan vruki,  
dama romobil neka kupi.





## TUŽIIOC

Igralište stara j' meta,  
pizdariju napravit jedva se čeka.  
Kopačkun ne moreš zakrampat,  
koščica na njoj da neče ostat.  
Ne more se dole igrat,  
nogomet va gradu će propast.  
Franci stari da će skopat,  
šesto let da su šli spat.  
Groblje da je tamo staro,  
Frankopani tamo zakopano.  
Arheološko daj otkriće,  
peć se tamo još ne miče.  
Raspala se je već va prah,  
ne bacelaju za nju jako baš.  
Zgljeda da je se to farsa,  
ko da su pali neki s Marsa.  
Kad blagostanje po gradu j' hodilo,  
iza utakmice se j' jilo i pilo.  
Naleteli su sad na kosti,  
kroz prozor ča su hitali domaći i gosti.  
Hitalo se j' koščice totu,  
maligani kad su bili va motu.  
Reflektori će oni tamo,  
zasvitlit nikad – to si znamo.

## MERIHO

Ima jedan čovik zreli,  
moramo reć, hteli il ne hteli.  
Kilometri va nogah ima,  
nogomet mu j' opsesija bila.  
Snagi va koraku ima,  
saku bocu s poda zima.  
Kropi on po gradu celen,  
sa škartocon velen belen.  
Saka boca je njegova,  
kad izajde opet zora.  
Saku kantu on prevrne,  
dok mu ruka ne utrne.  
Preokrene saku latu,  
kad ni boce hebe majku.  
Rumeno lice od rakije,  
kuliko ih on popije.  
Boce ukralo mu j' pred dućanon,  
šal ih je iskat aeroplanon.  
Preko pločic uvik kreće,  
preokrene sako smeće.  
Placa mu je glavna baza,  
politička j' to oaza.  
Lovačke on totu hita,  
istina se niš ne pita.  
Meša plave i crvene,  
slušaju ga samo bene.  
Hita uvik Ive jašku,  
naletet će na ku pračku.  
Henceri je pucal va kut,  
golmani zi kopački je uvik zul.

## BRANIOC

Crikvenica grad od gosti,  
teču pantigani po sred mosti.  
Ča se misli va nen vjeću,  
čepe uše i niš ne pokreću.  
Komunalac mudro zbori,  
na pitanje šegavo odgovori.  
Prehićeva balicu na druge,  
ni za mene, brigi su to tuđe.  
Uz potok su one šahti,  
uz njih ne moreš bez gas maski.  
Saka kiša jih nadigne,  
veli smrad zi njih zrine.  
Pantigani po njimi plaze,  
dok ih auti skroz ne zgaze.  
Papiri je tamo hrpa,  
naleti i blatna krpa.  
Turizmu j' to slika,  
ča se evde koga pita.





## TUŽI OC

Ni koščice, a ni mesa,  
hvalilo se j' advent do nebesa.  
Napuhanci oni skupi,  
budžet ti je probil rupi.  
Rukun moreš do kolena,  
to kupit more samo bena.  
Kade je ta ljudska masa,  
skoro da ni bilo pasa.  
Frigali su one friti,  
va ulju staren od ponfriti.  
Na nen trgu iza pošti,  
ni baš bilo neke forci.  
Baraki su bile prazne,  
vele cijene sad ih kazne.  
Kade je lova ta nestala,  
vječnike naše pokarala.  
Velu lovu su neki dobili,  
slabo advent uredili.  
Nestali su soldi od adventa,  
skuhan brudit ni i palenta.  
Meriko je zato kriv,  
se je krivo dogovoril.  
Evde su njegovi bili prsti,  
dobro je neš i on obrstil.  
Ovo će mu bit pokora,  
otpeljajte ga do nog mora.

## MERI KO

Mešate evde jabuki i kruški,  
ja dobijen zato buhci.  
Ne daje se sakomu soldi va ruki,  
kašnje su to vele bruki.  
Zač veštid niste mi zašili?  
Siguro ste šilice zatvorili.  
Va banke su mi napravili fintu,  
ne moren dignut ni jednu kintu.  
Da potkupin vaše face,  
osramotin vas nasred place.  
Zato san mizerija od glavi do pete,  
a vi govorite ča ćete.


## SUDAC

Summa summarum kada dođe,  
jušto ti tako se prođe.  
I evde j' došlo kraju,  
se smo čuli, i se znaju.  
Seh si evde va mizeriju stavil,  
gradu niš dobroga nisi ostavil.  
Se je sada evde jasno,  
reć ću presudu brzo i glasno.  
Neću sada više duljit,  
poć ćeš dole sad se spalit.  
Otpeljajte ga na ni stup,  
nek zgori, aš je glup!

Adio, mizerijo!





 Maškare Crikvenica  
 maskare\_crikvenica













 Maškare Crikvenica  
 maskare\_crikvenica







 Maškare Crikvenica  
 maskare\_crikvenica

















Maškaranu fotogaleriju pogledajte na [maskare.net](http://maskare.net)